

■ OR DA LA VETA DA LUDMILLA CAHENZLI

Plugls en il 21avel tschientaner

Ils Cahenzlis han da far cun pitschnas bestias

«Nunpussaivel», ditg jau.

«Bain quatter tocs!» di la gronda.

Jau ses en biro, tegn il corn dal telefon e spetg ch'jau vom en svaniment. Ma jau rest allerta.

«Vegns uss a chasa?» dumonda la gronda.

«Gea, jau vegn uschè svelto sco pussaivel», ditg jau.

Mia figlia pitschna haja plugls, ha la gronda gist ditg. Jau na pos anc adina betg crair. Plugls aveva la glieud en il temp dals cuvels, forsà anc en il temp medieval. Ma ozendi? En il 2003?

Jau mett en il numer da telefon da mia mamma. Nagin prenda giu. Daco è quella adina sin il sfratg, sch'ins dovr ella? Uschia stoss jau empruvar tut persula da pensar cler. Ma quai che vegn endament n'è betg empernaivel. Probabel ha era la gronda plugls. Lezza di gia dapi trais emnas ch'ella haja che morda. Jau hai ditg ad ella: «Quai vegn dal crescher.»

Dieu ma chastia cun uffants plain plugls. El ma strufegia perquai ch'jau vom a lavurar, na stun betg a chasa e lav

mintga saira il chau a mes uffants, pens'jau. Quest patratg dura però be duas secundas. Lura ma ditg jau: Ludmilla chala cun quest pensar catolic, ti sas che Dieu è in prima tip che ha gugent tuts e schizunt tai, la finala lavuras gea era be a temp parzial.

Sinaquai cumenza anc l'emanza en mai a pledar: «Insumma. Dieu è bain in dunna. E sco dunna ha ella segir chapientscha per talas situaziuns.»

E sa tge tip ch'ina Dieua dess a Ludmilla?

«Va e cumpra schampo!»

«Engraziel per il tip.»

«Fai zacu!»

En l'auto ma vegni endament ch'i fiss forsà clever da cumprar il schampo da plugls en il vitg vischinant. Sch'jau vom en nossa apoteca per schampo da plugls, sa suenter l'entir vitg ch'ils Cahenzlis han plugls. Quai na dovran ils auters betg savoir. Jau tegn avant la drogharia dal vitg vischinant.

Il droghist fixescha immediat mia chavalera cura ch'jau ditg ad el tge ch'jau less. La dunna sper mai va dus

pass plinenvi. Jau sent ch'ella ma taxesch. Jau ves tuttenina mamezza tras ils eglis da questa dunna: malpetgnada, mallavada. Na da smirvegliar che quella ha plugls.

En l'auto dovre intginas blastemmas fin ch'jau hai scurlattà giu l'egliada penetranta da questa dunna.

Strusch ch'jau sun a chasa, svanescha la chasarina che pertgira ils uffants gia dad isch ora. Ella è adina svelta da bandunar il plaz da lavur, ma questa giada metta ella si in nov record. Jau vom per il «Naturführer» e guard suenter co ch'ils plugls vesan ora. Lura pren jau a maun mes uffants e tschertg sin lur chaus in animal che vesa ora sco il plugl ch'è dissegnà en il «Naturführer». Betg schanza. Jau na chatt nagut.

«Ma jau hai vesì quatter tocs sin il chau da la pitschna!» insista la gronda.

En il pac cun il schampo chattain nus in petgen, gain cun quel tras ils chavels da mintga uffant e pren mira, ils schanis cumparan.

L'interessant è ch'els na sa laschan betg smatgar ora be cun in det. Ins sto

propi smatgar cun l'ungla per far star els. Ma laschaintas talas brutalitads.

Eugen vegn era a chasa. El chatta ch'i saja legher ch'ils uffants han plugls. Fin ch'el va cun il petgen tras ses agens chavels ed i vegn era ora ina da questas bestias.

L'entira famiglia sa renda en il bogn: Il rest stat atgnamain scrit sin il cedel d'instrucziun per l'adiever dal schampo: Il chau vegn unschì en cun schampo, lura èsi da spetgar tschintg minutas. Lura lavar ora il schmapo cun aua tievia. Lura repeter la procedura ina segunda giada. Lura stgarsinar ora ils plugls futschs cun il petgen da plugls. Per la famiglia Cahenzli fa quai pia diesch giadas unscher en, diesch giadas lavar il chau e tschintg giadas stgarsinar. Suenter la segunda giada lavar il chau, hai mo pli aua fraida. Ma gliez è in'atra story.

Ludmilla Cahenzli

Bilantscha: Eugen veva in plugl (quel da l'entschatta). Ludmilla trais. La gronda diesch. Il mesaun trais. La pitschna set (inclus quels che la chasarina e la gronda avevan gia chattà suentermezdi).